

2. Prof.dr. Edin Ramić

...U nekoliko poglavlja autori obrađuju pojam konvergenzijske i trendove Evropske unije, kao i oblike saradnje unutar organizacije i van nje koji su uzročno determinisani stanjem i funkcionisanjem institucija EU, ekonomije, rukovođenja, (menadžmenta) sadašnjim stanjem i futurološkom vizijom saobraćaja na evropskim putevima....

...Evropska unija je tokom integracijskog procesa izrasla u novu strukturu koja ne pripada niti jednoj tradicionalnoj pravnoj kategoriji. Evropska unija nije ni federacija ni konfederacija. Ona je rješenje između nadnacionalne i međudržavne forme organizovanja suverenih država. Otuda su, prema stanovištu autora, svim članicama Evropske unije više ili manje nužne kozmopolitizacije i identiteta i ambijenata na njihovom i putu Evropske unije, što podrazumijeva političku zajednicu modernih složenih identiteta i jednakopravnosti na temelju zakonitosti.

Od decembra 2009. godine Evropska unija funkcioniše na temelju reformskog - Lisabonskog ugovora. Promjene koje je donio ugovor iz Lisabona sadržane su u više odrednica. Lisabonskim ugovorom precizno su podijeljene nadležnosti između Evropske unije i zemalja članica. Nadležnosti su podijeljene tako da Evropska unija ima nadležnosti koje su joj povjerile zemlje članice u ugovoru iz Lisabona. Istovremeno, sve druge nadležnosti potpadaju pod ingerencije država članica.

Autori u središte svoje kritičke analize uvode i pretpostavke i mogućnosti odvijanja procesa integracije Bosne i Hercegovine u Evropsku uniju. U analizi se posebno mjesto daje novom pristupu Evropske unije prema Bosni i Hercegovini na njenom putu ka članstvu u Evropsku uniju. Glavno pitanje koje se postavlja jeste kako preći iz postdejtonske u proevropsku, briselsku fazu. U tom kontekstu smatra se veoma značajnim korak koji je uslijedio nakon što je Vijeće za vanjske poslove EU donijelo odluku o stupanju na snagu Sporazuma o stabilizaciji i pridruživanju sa Bosnom i Hercegovinom. Aktiviranje Sporazuma o pridruživanju i stabilizaciji autori posmatraju kao "posljednju šansu za Bosnu i Hercegovinu". Bosna i Hercegovina je nakon aktiviranja Sporazuma o pridruživanju i stabilizaciji dobila šansu da se opredijeli za temeljne reforme i njihovo provođenje....

...Velika Britanija, kao čisto ostrvska država je oduvijek imala pomalo zazor prema kontinentu i Evropi otvorenoj u svim jedinstvenim tržišnim aspektima. Međutim, i druge članice EU imaju svoje verzije evroskepticizma. Tako u Francuskoj nalazimo čak i termin koji se upotrebljava kao sinonim engleskom pojmu evroskepticizma - souverainisme. Francuski pojam naglašava, dakle, suverenitet, te je zabrinut

zbog sve većeg uticaja insitucija EU na francusku unutrašnju politiku....

...Ovdje se, dakle, radi o „ograničenom protivljenju“, što je svojstveno za države Zapadnog Balkana. Referendumska odluka Velike Britanije o izlasku iz Evropske unije - British withdrawal from the European Union, skraćeno Brexit, donesena 23. juna 2016. godine, ne predstavlja nikakvo iznenađenje za ostalih dvadeset sedam država članica Evropske unije. Revizionisti, grupa zagovornika u Velikoj Britaniji, koji zagovaraju povratak na stanje prije velike revizije Ugovora 1992. godine, uspjela je da referendumom donese odluku ali ne i da trenutno postigne cilj. Međutim, procedura izlaska iz EU regulirana je evropskim ugovorima. Riječ je o članu 50., uvedenom Lisabonskim ugovorom 2009. godine. On definiše uslove dobrovoljnog izlaska iz EU.

Knjiga *Teorija konvergencije, (Konvergencija menadžmenta i prava i inteligentni transportni sistemi u drumskom saobraćaju kao bitni faktori razvoja ujedinjene Evrope)* predstavlja koherentnu naučnu studiju o evropskim integracijama, koje se odvijaju od sredine XX stoljeća i traju do današnjeg vremena. U provođenju istraživanja evropskih integracija, autori svoja stajališta izvode na temelju savremene i relevantne literature u polju evropskih integracija. Na izvedenom teorijsko-kritičkom pristupu autori oblikuju stajalište po kome je Evropska unija postala vodeća civilna sila u međunarodnim odnosima. U sučeljavanju svojih sa drugim teorijskim stajalištima, autori izvode kritičku analizu mogućnosti odvijanja integracije Bosne i Hercegovine u Evropsku uniju. Pri tome potcrtavaju da je evropeizacija Bosne i Hercegovine moguća tek uz pojačanu medijaciju institucija Evropske unije naspram odvijanja procesa integracije Bosne i Hercegovine u Evropsku uniju....

...Izdavaču, Internacionalnom univerzitetu Brčko, Brčko Distrikt BiH, toplo preporučujem da objavi knjigu *Teorija konvergencije (Konvergencija menadžmenta i prava i inteligentni transportni sistemi u drumskom saobraćaju kao bitni faktori razvoja ujedinjene Evrope)*, autora Šabana Nurića, Hamdija Muratović, Stojan Aleksić, Rame Mulahusejnovića i Davor Ivanović....

Brčko Distrikt BiH, juli 2018.

Prof. dr. Edin Ramić